

**1269-1269- OFP - Acta Capitulum Generalium apud Parisius Celebrati**

In nomine patris et filii et spiritus sancti. Amen.

Acta capituli generalis Parisius celebrati  
anno Domini · M° · CC° · LXIX° ·

Confirmamus has constitutiones. In capitulo de domibus concedendis. ubi dicitur. curam predictarum non recipiat. nisi per tria capitula fuerit approbatum. addatur. et nisi per dominum papam. ordini committatur. Et hec habet · iii · capitula.

Item hanc. In capitulo de graviore culpa. ubi dicitur de conspiratoribus. nec eis aliqua obediencia iniungatur. addatur. nisi per magistrum et diffinitores generalis vel provincialis capituli fuerint restituti. Et hec habet · iii · capitula.

Item hanc. In capitulo de capitulo provinciali. ubi dicitur. alias enim plurium sententia prevalebit. addatur. si autem per adiunctionem vel absenciam prioris provincialis. vel eius vicarii. vel casu aliquo contingente. partes fiant equales. unus ab eisdem. de capitulo eligatur. et in quorum partem ille declinaverit. illorum sententia prevalebit. Et hec habet · iii · capitula.

Item hanc. In capitulo de capitulo generali. ubi dicitur. diffinitores itaque predicti. addatur. postquam fuerint accusati. quando ipsis videbitur expedire. excessum magistri. etc. Et hec habet · iii · capitula.

Item hanc. In capitulo de capitulo generali. ubi dicitur. diffinitores audiant accusantes. addatur. auditus vero accusationibus. secedat. ut eo absente; diffinitores de eius correctione conferant et disponant. Et hec habet · iii · capitula.

Item hanc. In eodem capitulo. ubi dicitur. si autem magistrum aliqua occasione abesse contigerit. deleatur quod sequitur. usque ibi. isti autem. etc. et dicatur sic. unus de diffinitoribus eiusdem capituli. ab ipsis diffinitoribus. vel maiori parte eorum. assumatur in magistri vicarium. qui durante capitulo. vices magistri gerat; in omnibus dumtaxat que ad tractatum. et acta capituli pertinebunt. qui extra capitulum locum suum teneat. et in diffinitionibus unam tantum vocem habeat. quod si in eius assumptione in partes equales se diviserint. unus de presentibus fratribus eligatur ab ipsis. et in quorum sententiam ille declinabit; ille pro vicario habeatur. Et hec habet · iii · capitula.

Approbamus has. In capitulo. de officio ecclesie. ubi dicitur. surgant fratres dicendo [officium] de beata virgine. deleatur. dicendo. et dicatur sic. surgant fratres. et stando dicant officium de beata virgine. Et hec habet · ii · capitula.

Item hanc. In capitulo de electione prioris provincialis. ubi dicitur. si tunc non elegerint qui debent eligere. potestas eligendi ad magistrum ordinis transferatur. deleatur totum. et dicatur sic. quod si tunc non elegerint. qui debent eligere vel electionem fecerint. que irrita sit. ipso iure potestas providendi ad magistrum ordinis transferatur. Et hec habet · ii · capitula.

Item hanc. In capitulo de electione magistri. ubi dicitur. in anno autem priorum provincialium. duo de diffinitoribus immediate precedentis capituli provincialis. qui primitus habitum nostri ordinis susceperunt. addatur. qui tunc superstites fuerint. Et hec habet · ii · capitula.

Item hanc. In capitulo de capitulo generali. post illud. quandoque aliud videatur. addatur. necessitate vero urgente. magister cum assensu prioris provincialis. in cuius provincia generale capitulum fuerit celebrandum. de consilio discretorum. ad alium conventum eiusdem provincie capitulum transferre possit. Et hec habet · ii · capitula.

Item. In oratione. a cunctis. post illud. et beatis apostolis tuis Petro et Paulo. addatur. atque beato Dominico. Et hec habet · ii · capitula.

Item. In rubrica misse. ubi agitur de pace danda. ubi dicitur. in dominicis autem diebus. addatur. et festis semiduplicibus et supra. Et hec habet · ii · capitula.

Item. Infra. ubi dicitur. illi vero qui pacem receperint. deleatur totum. usque ibi. in ceteris autem diebus. nunquam pax detur. etc. Et hec habet · ii · capitula.

Item. Infra. ubi dicitur. si festum duplex. vel totum duplex. in dominica evenerit. deleatur hoc totum. et dicatur sic. in festis duplicibus. et totis duplicibus. etc. Et hec habet · ii · capitula.

Inchoamus has. In capitulo de electione prioris conventualis. ubi dicitur. fratres autem post duos annos. deleatur. post duos annos. et dicatur. · iiiior · annos.

Item hanc. In capitulo de capitulo provinciali. ubi dicitur. infra vero idem tempus. deleatur. idem tempus. et dicatur. quinquennium.

Item hanc. In capitulo de studentibus. post illud. ubi viget studium. addatur. extra suas provincias. de diffinitorum capituli provincialis. vel maioris partis eorum. consilio. et assensu. ubi aliquem missorum studencium infra · vi · menses a tempore celebrati capituli mori contingerit. vel alias impediri.

Item hanc. In capitulo de electione diffinitorum. ubi dicitur. cui socius competens a priore provinciali. et diffinitoribus assignetur. deleatur totum et dicatur sic. cui socius post electionem diffinitoris. ab eodem

capitulo provinciali eligatur. et qui plures voces. eciam citra medietatem eligendum habuerit; diffinitoris socius habeatur.

Item hanc. In capitulo de ieiuniis. ubi dicitur. nisi dies natalis domini. ea die evenerit. usque ibi. precipuum festum fuerit. deleatur totum. et dicatur sic. quadragesimali utimur cibo. nisi in dictis sextis feriis tantum cum aliquo propter laborem dispensetur. vel in locis. in quibus in eisdem sextis feriis aliter comederetur. vel eciam precipuum festum fuerit.

Item hanc. In capitulo de visitoribus. ubi dicitur. si qua autem gravia et periculosa invenerint. addatur. emersisse. a tempore visitacionis ultimo facte per visitatorem precedentem.

Item. In rubrica misse. dominica in ramis palmarum post illud. nec signent se fratres. addatur. cum ille qui legit passionem. pronunciaverit. emisit spiritum. sileat. et totus chorus prosternat se super formas. devote gracias agens redemptori. donec facto signo a prelato. surgat chorus. et lector prosequatur passionem. Idem eciam fiat in aliis passionibus. ubi dicitur. expiravit. vel tradidit spiritum.

Item. In capitulo De itinerantibus. in fine addatur. si quis fratrum ordinis nostri per se. vel per alium ordinationem de se vel de alio fratre factam. vel obedienciam sibi vel alii fratri iniunctam. per quamcumque personam. extra obedienciam nostri ordinis constitutam. quocumque modo procuraverit revocari. vel in aliqua provincia. vel conventu. aut officio. seu eciam studio generali poni. remanere. vel inde amoveri. vel cum personis extraneis commorari. ipso facto. ex vi presentis statuti. tam in vita. quam in morte. suffragiis ordinis et omni voce. tam in electionibus. quam in tractatibus eorum. que ad capitulum sunt mittenda. penitus sit privatus. nec ad predicta restitui valeat; nisi per magistrum ordinis. vel diffinitoris capituli generalis.

Item hanc. In capitulo de domibus concedendis. in fine addatur. singule provincie nostri ordinis. exceptis provinciis Terre sancte et Grecie. dividantur in duas. quam divisionem magister ordinis. et diffinitores capituli generalis. immediate sequentis. postquam inchoata constitucio approbata fuerit et confirmata. facere teneantur. et facient secundum modum eisdem tradendum. a singulis provinciis dividendis. quem modum ipse provincie tradere teneantur infra nominatum capitulum immediate sequens post confirmationem predictam. Et si alique provincie in modum divisionis non convenerint. duos fratres mittere teneantur et mittant. qui in dicto capitulo generali dictis magistro. et diffinitoribus referant. que circa divisionem viderint expedire. Quod si modum divisionis predictae infra memoratum tempus magistro et diffinitoribus non presentaverint. nichilominus ex tunc dicti magister et diffinitores. ad divisionem procedant et nomina ipsis provinciis divisim imponant. et de numero qui nunc est studentium mittendorum ad generalia studia unum diminuant. Et quicquid in constitucionibus huic ordinationi contrarium. vel dissonum invenerint. corrigant vel immutent. Quod si a dicto capitulo magistrum aliquo casu abesse contigerit. vicarius eius. cum ceteris diffinitoribus. ad executionem predictorum procedant. et si memorati magister vel eius vicarius. ac diffinitores. ad divisionem aliquarum provinciarum in dicto capitulo procedere non valerent. nichilominus magister per se ipsum. dividendi dictas provincias plenariam et liberam habeat potestatem. et exequatur. quam cito obtulerit se facultas. et si inter aliquas provincias contiguas de una ad aliam aliquos conventus transferre oportuerit; id faciendi de ipsarum provinciarum assensu. magister ordinis liberam habeat potestatem.

Iste sunt admoniciones.

Caveant priores provinciales et conventuales. ne sint faciles ad facienda precepta; nisi urgens necessitas id exposcat.

Item. Priores provinciales cum diffinitoribus. in instantibus capitulis provincialibus. talem modum de provisionibus ordinent. si nondum ordinauerint. quod provideatur non solum studentibus Parisiis. sed eciam in aliis generalibus studiis constitutis.

Item. Fratres itinerantes. litteras testimoniales secum ferant. quas priores. vel eorum vicarii requirant. nisi in die sui adventus; obtulerint eas ipsis.

Item. Districtius inhibemus. ne alibi quam in infirmariis. vel in domibus recreacionis. eciam occasione minucionis. seu alterius cause cuiuscumque. pulmenta cocta cum carnibus. vel condita cum sagimine comedantur.

Item. Caveant fratres itinerantes. ne cibos comedant. in quibus evidenter apparent carnes trite vel secte.

Item. Priores et fratres curam habeant diligentem. quod nomen beati Dominici et beati Petri martyris. in kalendariis. et in letaniis religiosorum et secularium annotetur. et quod fiant festa eorum.

Item. Tam priores. quam visitatores. constituciones de sedendo in terra. pro fractione silencii. et de pecunia non portanda. et de non equitando. ei currizando; arcius faciant observari.

Item. Priores et predicatorum generales et socii eorum. qui non possunt venire ad capitulum. nisi in equis vel vecturis. remaneant in conventu.

Item. Districte precipimus prioribus et superioribus et eorum vicariis. quod fratres leprosos. extra septa domorum nostrarum morantes. infra nativitatem domini nunc instantem revocent. et secundum constitucionem infra areis collocentur. quod si neglexerint adimplere; ex tunc in singulis septimanis duobus diebus in pane et aqua ieiunent. donec id curaverint effectui mancipare.

Item. Priores vel eorum vicarii. diffinitores capituli generalis transeuntes per eorum conventus. euntes et revertentes. deducant. vel deduci faciant ad conventus proximos; necessaria procurando.

Item. Fratres et priores. quibus crucis predicatio est commissa. commissionem sibi factam diligentius exequantur. et tam ipsi. quam ceteri fratres. cum se facultas obtulerit. testatores inducant ad elemosinam faciendam. in subsidium Terre sancte. et sint diligentes denunciare ubique in suis predicacionibus; passagium domini regis Francie. quod erit in prima septimana sequentis maii in portu de Aquis mortuis.

Item. Singulis diebus profestis in missa conventuali post. pater noster. cum prostratione. dicatur psalmus. deus venerunt gentes. cum versiculis et oracionibus ab illo. qui dicit missam. dicendis. et hoc incipiatur post pascha.

Item. Ordinationem factam de scrutinio priorum provincialium; revocamus.

Item. Priores provinciales. et conventuales. per generale capitulum absoluti vel provinciale. ad eadem officia. in provinciis eisdem vel conventibus; non resumantur illo anno.

Item. Ad refrenandum dampnosum apostatarum discursum. magister ordinis de diffinitorum consilio et assensu. potestatem concedit prioribus provincialibus et conventualibus et eorum vicariis. ut apostatas. quos infra terminos suos invenerint. undecumque venientes. possint excommunicare. capere. ligare. incarcerare. et alias subdere ordinis disciplinis. Insuper concedit et committit eisdem; ut si aliquos ceperint. et incarceraverint. ipsos ab excommunicationis sententia possint absolvere. et rursum si effugerint; possint in eosdem excommunicationis sententiam renovare. quam ferent in eos conditionaliter. statim post absolucionem eorum.

Item. De eorumdem diffinitorum consilio et consensu. concedit supprioribus et eorum vicariis. quod in die tractatus eorum. que ad capitulum provinciale vel generale sunt mittenda. fratribus qui intersunt tractatui. precipere possint. ne prioribus revelent petentes absolucionem eorum. vel aliis per quos possit ad priorum noticiam pervenire.

Hec suntsuffragia.

Pro domino papa et collegio cardinalium. etc.

Pro fratre Imberto. et fratre Symone de Ancona. etc.

Committimus magistro ordinis ordinationem studii Parisiensis. et aliorum studiorum generalium · iiiior · provincialium. ut de ipsis. in magistris et baccalareis. et aliis ad studium pertinentibus curam habeat diligentem.

Concedimus provincie Hispanie · ii · domos.

Item. Francie · i · Romane · ii · Theotonie · ii · Polonie · i · Anglie · ii · Terre sancte · ii · Polonie · i · ubi priori provinciali et diffinitoribus capituli provincialis videbitur expedire. et non recipiantur in preiudicium aliarum provincialium.

Absolvimus priores provinciales. Provincie et assignamus eum lectorem studio conventus Montispessulani. Theotonie. Francie. Hungarie; Polonie.

Absolvimus. Priores conventuales. Trecensem. Rothomagensem.

Item. Priorem Traiecti superioris. qui contra ordinationem diffinitorum capituli provincialis. confirmatus fuit in provincia Theotonie.

Item. Priorem Montispessulani.

Assignamus sequens generale capitulum apud Mediolanum. in provincia Lombardie.

Et veniant diffinitores ita tempestive. quod sint ibi dominica infra octavas ascensionis. Sententias iudicum approbamus.